

DISSERTATIO MEDICA 35  
INAVGVRALIS,  
Sistens

RESONITVM  
EXPERIENTIA COM-  
PROBATVM,

Quam  
*Divina Favente Gratia,*  
AUCTORITATE ET CONSENSU  
GRATIOSISSIMAE FACVLTA-  
TIS MEDICAE

*In Alma Argentoratensium Universitate*  
PRO LICENTIA  
Summos in Arte Medica Honores  
ac Privilegia Doctoralia rite  
capeffendi

SOLENNI *Eruditorum Examine*  
exponet

HENR. SIGISMVNDVS STOSCH,  
CUSTRINE NS. NEO-MARCHICUS.

*Ad D. I. August. M DCC XXII.*

H. L. Q. S.

---

ARGENTORATI  
TYPIS JOHANNIS HENRICI HEITZII.



23  
SACRÆ REGIÆ

MAJESTATIS BO-  
RUSSICÆ

REGIMINIS NEO-MARCHICI

CANCELLARIO,

DIRECTORI & CONSILIARIIS,

VIRIS

PER-ILLVSTRIBUS, GENEROSISSIMIS,  
AMPLISSIMIS, CONSVLTISSIMIS,

DOMINIS SVIS GRATIO-  
SISSIMIS

&

OMNI CVLTV VENERANDIS

Hanc suam

DISSERTATIONEM INAVGVRALEM

lubens meritoque

Dicat & dedicat

AVCTOR.





Nobilissimo & Præcellenti  
HENR. SIGISMUNDO STOSCH,  
Medicinæ Candidato Dignissimo,  
Fautori & Convictori hætenus suo æstumatissimo,  
JOH. SALZMANN. D.  
εὐπράττειν !

**A** B eo tempore, ex quo mihi innotuisti,  
NOBILISSIME STOSCH, exi-  
mias animi dotes, laudabilemque di-  
scendi ardorem in TE deprehendi.  
Quas etiam, quamdiu nostris in Scholis  
versatus es, adeo excoluisti, ut cum Bo-  
norum Omnium, tum maxime Præceptorum Tuorum  
amore & benevolentiam TIBI dudum conciliaris.  
Cum primis in nupero Examine, ut vocant, Doctorali eos,  
quos in Scientia Medica TIBI comparasti, profectus no-  
is tam egregie (absint blanditiæ) probasti, ut totum  
Collegium nostrum unanimi illos consensu approbaret.  
Non minus luculentissimum eorum documentum præ-  
sent præsentis, quas de RESONITV in lucem emittis  
Theses,



*Theses, a cujus pertractatione nec argumenti difficul-  
tas, nec lites, quæ a multis retro annis inter dissentien-  
tium partes de illo gliscebant, avocare TE poterant,  
nodum hunc Gordium uno non quidem gladii, sed oculi  
ictu, Observationibus puta & autopsia dissolvendo.  
Nihil superest, quam ut & hoc labore cum laude & ap-  
plausu exantlato digna studiis premia & Summi in  
Arte Medica Honores promeriti TIBI conferantur.  
Macte ergo his Titulis hacque virtute TVIS in arte  
salutari profectibus augendis invigilare perge, atque ea,  
quæ hausisti, solida artis praecepta in futura Praxi Cli-  
nica in succum & sanguinem converte. Ita fiet, ut  
Excell. Dn. PARENTIS (cujus favori domum re-  
dux me commendes rogo) Patronorumque spem & ex-  
pectationem adimpleas, quin & superes. Ita etiam  
fiet, ut solida consummataque, qua ILLE pollet, expe-  
rientiæ Medicæ hares ex asse aliquando evadas. Ita de-  
nique fiet, ut Gentis TVÆ Splendorem Gloriamque du-  
dum partem egregie tuearis & amplifies, atque hac ra-  
tione, quod Venerando Dn. PARENTI magno in-  
profecta, qua est, ætate solatio erit, Fratrem TVVM,  
egregium quondam Philiatrum, restituas & revivi-  
scere facias. Quod ut consequaris, parem quidem,  
quæ Ipsi obtigit, fortunam, sed diuturniorem corporis  
valetudinem, magisque perennantem vitam TIBI  
animitus apprecor. Perscr. Argent. d. VI. Kal.  
Aug. MDCCCXXII.*





## Proœmium.



*A*put, nobilissima corporis  
humani pars & sensuum  
internorum pariter ac ex-  
ternorum domicilium,  
adeoque sacra Palladis  
arx, Mnemosynesque de-  
lubrum jure vocatum, quod cælum in  
mundo, quod culmen in edificio, idem hoc  
corpori esse non inepte pronuntiatur. In  
loco ejus maxime edito à Sapientissimo  
Creatore collocatum est, ut functionibus,  
quibus destinatum, melius vacare posset.  
Sed huic ipsi etiam situi debetur, quod à  
variis extrinsecus advenientibus rebus  
violentis non raro ledatur & afficiatur,  
id quod præter experientiam, optimam re-  
rum magistram, tantum non quotidiana  
Medicorum Chirurgorumque observatio-  
nes abunde loquuntur. Inter lesiones, qui-  
bus supremus hic venter, maxime vero



cranium expositum est , non ultimo loco  
 veniunt fracturae , quae eo graviores sunt,  
 adeoque prae aliis considerari merentur,  
 quo cerebro, partium uti praestantissima  
 ita & mollissima major inde noxa immi-  
 net. Videas enim non raro teneram ejus  
 substantiam simul ladi, non raro etiam il-  
 lud vehementer concuti, aut ob damna  
 involucris, quae Meninges vocant, aut  
 vasis illata, in consensum trahi. Neque  
 eum, qui Medicorum Chirurgorumque  
 Scholas vel è longinquo salutavit, latere  
 potest vel saltem debet, plures dari fractu-  
 rarum species, quae cum à plerisque, qui  
 hanc materiam pertractarunt, sollicite  
 tradite jam fuerint, iis recensendis merito  
 supersedeo. Prae aliis Medicorum Pa-  
 rens Hippocrates Lib. de Cap. Vuln. &  
 Paulus Aegineta de Re. Med. Lib. VI.  
 Cap. 90. suo jam tempore illas accurate  
 consignarunt, nobisque reliquerunt. E  
 quorum monumentis depromptae atque in  
 suas classes distributae leguntur in Dissert.  
 de Mira Cranii Fractura sub Praesidio  
 Excell. D. D. SALZMANNI, Fau-  
 toris, Patroni ac Praeceptoris mei maxi-  
 me



me venerandi, Argentor. 1718. habita, ad quam lectorem remitto. Ego in eo præcipue occupatus nunc ero, ut Speciminis Inauguralis loco de quinta specie, quam Contrafissuram vocant, quadam commenter, ea potissimum ratione inductus, quia de ipsa hac fractura in Medicorum scholis multum ab omni fere tempore disceptatum fuit, aliis tanquam pro aris & focis pro ista pugnantis, aliis è contrario eandem negantibus atque è pomæriis Artis proscribentibus. Utraque pars rationibus bene multis innititur, neque ipsi desunt observationes. Cum vero experientia, solidam intelligo atque firmam, omni ratione potior habenda sit, id maxime agam, ut dictam Contrafissuram, posteaquam argumenta eam affirmantium pariter ac negantium protulero, aliquot observationibus rarioribus adstruam atque stabiliam, & ut longus peculiarisque fracturarum decursus curiosorum oculis se melius sistat, iconem calci subungere è re duxi. Quod dum aggredior, à Medicina Datore Statoreque, ut felici qualescunque meos conatus successu secundare velit, submissis precibus contendo.



## CAP. I.

De Etymologia, Synonymia, Definitione  
& Differentiis Contrafissura.

## §. I.

**C**ontrafissura Vocabulum in Medicorum Chirurgorumque Scholis non adeo infrequens haud prolixa, uti opinor, deductione eget, adeoque nil aliud monebo, nisi quod *Fissura* à findendo derivata partibus duris, quales ossa existere extra omnem dubitationis aleam positum est, conveniat, quorum continuitatem solutam Medici æque ac Chirurgi *Fissuram* appellant; Quando jam Contrafissuram allegant, nil aliud quam fissuram in loco percussioni contrariam seu oppositam innuere videntur. Græcis & quidem *Paulo Aegineta* dicitur ἀπὸ ἤχης, ab ἀπὸ & τῆς ἤχης metonymice causam pro effectu ponentibus, sicut enim sono corporibus accommodis & angulis allidente echo, sic capite gravius percussio alia quam in ictus parte ἀπὸ ἤχης seu ab echo responsio exoritur aut ad minimum metuenda est, Verba sunt *Celeb. Wedel. Disp. de Contrafiss. è Princip. Mech. Phys. ac Med. ded.* Gallis vocatur *Contrefente*, ou *Contrecoup* Germ. Ein *Gegen-Riß*/ein *Wieder-Bruch* oder *Wieder-Schlag*.

## §. II.



## §. II.

Synonyma varia apud Auctores occurrunt. Ab Hippocrate dicitur *ἔμφορα* *Infortunium*, *Calamitas*, nec sine causa, quia judicante *Petr. Pavvio Anat. Succent.* infelices & infortunati sunt ejusmodi ægri; qui nec ipsi sciunt, an & quo loco læsi sint, nec Medicus vel Chirurgus certior de re fieri potest, nisi cum jam conclamatum est. *Paulo Ammanno Resonitus* vocatur in *Dissert. Pecul.* Aliis *Rima ceca*, quoniam sub sensus non cadit, abrafo etiam capillitio remotaque cute, potissimum si rima subsit in tabula interna; probe tamen distinguenda à rima cœca quæ & capillaris audit.

## §. III.

Definitur autem *Contrafractura*, quod sit *fractura cranii*, in qua vis agens seu percussio in uno loco, lesio vero in alia parte quandoque opposita, contingit, cum cerebri commotione, sanguinis extravasatione aliisque symptomatibus stipata. Genus remotum in hac definitione *Fractura* constituit. Proximum autem à subjecto læso est desumptum, quod est superior *Capitis pars*, magnam illam cavitatem osseam efficiens, quæ *Cerebrum* includit, *Cranium* seu *Calvaria*; de cujus figura & structura, quantum ad institutum meum facit, annotandum I. Figuram ejus esse ovalem exceptis lateribus, quæ satis depressa sunt, II. *Cranium* non ex unico ac continuo, sed multis



ossibus esse contextum, & quidem sex ita dictis propriis atque duobus cranio cum maxilla superiore communibus. III. Hæc ossa, ubi sibi invicem junguntur, plures eminentias dentatas seu ferræ dentibus similes habere, quæ futuræ dicuntur. IV. Eadem ossa, quoad crassitiam & tenuitatem plurimis in locis differre, in quibusdam enim magis tenuia illa & pellucida existere, v. gr. in bregmate superiore, occipitio inferiore & parte laterali ossium temporum. V. Substantiam eorum duplicem esse atque in interiorrem & exteriorrem lamellam cum interjecta Diplœ seu substantia osseo-spongiosa dividi. Hæ lamellæ vocantur a Chirurgis Tabulæ, die innere und äussere Taffel: quarum exterior quidem interiorrem crassitie, interior exteriorrem duritie superat, adeo ut hanc ob rationem vitrea ab Anatomicis appelletur. VI. Duram matrem seu crassam meningem plurimis fibris per futuras emissis cum pericranio firmiter connecti illudque formare. Quæ fusius deduxit *Cl. Wedelius l. c.*

#### §. IV.

Ut differentia Contrafissuræ ab aliis Cranii fracturis dignoscatur, tum locum ab instrumento externo vi agente percussum, tum etiam fractum annotari necesse est, quo facto res clara evadit dicendo, uti locus percussus & simul fractus in reliquis læsionibus unus idemque est, ita in Contrafissura illum differre. Hoc tamen ipso id non volo, ac si locus fractus illi, qui percussus est, semper è diametro oppositus esse debeat, sed Contrafissura etiam dicitur, si quando fissura ab illa



illa partè, cui ictus inflictus est, non ita multum distat, ita ut rima vel ultra futuras exporrigatur, vel etiam tabula exteriorè integra permanente interior findatur, vel alio modo duo loca supra memorata differant. Quànquam si dicendum quod res est, *Contrafissura*, quæ in loco ictui opposito evenit, κατ' ἐξοχὴν seu in gradu eminentiore talis appellari meretur. E quibus jam patet, plures hujus mali differentias occurrere, quas e Pavvio aliisque congeffit *Cl. Ammannus Diss. de Resonitu Cap. II. §. 5.* & octo ejus classes describit, quarum I. est, qua fronte icta integra occiput finditur, & contra; II. Ubi pars capitis dextra icta est, & sinistra fissa deprehenditur & vice versa; III. Si quando pars vicina læditur illæsa ea, quæ ictum acceperat. IV. dum rima capillaris non nisi in externa tabula hæret. V. Sic ubi ictus utramque tabulam penetrat. VI. Fit quando ictus in tabulam externam incidens, in interna fissuram generat salva manente externa. VII. Ubi interior lamina finditur in fragmenta meningis & cerebrum pungentia. VIII. Contingit, quod si fissura & in parte icta & in opposita simul deprehenditur.

### §. V.

Quod si jam has species accuratiori examini quis subjiciat, facile intelliget, illas ad minorem numerum redigi posse quin & debere, nam quod primam & secundam attinet, illæ parum à se in vicem discrepare mihi videntur. Quartam & quintam immerito *Contrafissurarum* familiæ



miliæ adscribi arbitror. De sexta & septima idem ac de duabus primis sentiendum esse puto, nempe quod vel plane non vel parum admodum inter se diversæ sint. Denique de octava annotamus, dubium oriri posse, an non & illa è Contrafissurarum catalogo expungenda, atque solum fissura continuata dicenda sit, nisi statuere quis velit, rimam à loco ictu exporrectam in medio cursu desinere. His ita positis Contrafissurarum numerum nonnisi ad ternarium vel saltem quaternarium accedere in propatulo est.

## §. VI.

Idem vero numerus iterum augebitur, si peculiarem resonitus speciem, quam *Jac. Berengarius Lib. de Fract. Cran. p. 1. & Amat. Lusitan. Cent. III. Cur. 42. & Gabr. Fallopius de Vuln. Cap. c. 14.* in scenam proferrunt, recensitis annumeraverimus, quæque non tamen partibus capitis continentibus, scilicet Cranio, sed in contentis vasis nunc Meningum nunc ipsius Cerebri accidit. Si quando ab ictu calvariæ inflicto dictorum vasorum unitas dissolvitur, adeoque fluidum quod vehere solent extravasatur. Verum liceat pace tantorum Virorum illud monere, quod Contrafissuræ vocabulum pariter ac istud fracturæ de durioribus solum, non æque de mollibus capitis partibus usurpatum hæctenus à naturæ Mystis fuerit, à quorum placitis, ut hac in re secedam, sufficientes rationes non suppetunt.



## C A P. II.

*Argumenta eorum , qui Contrafissuram  
stabilire conantur , proponit.*

### §. I.

**Q**Uod olim jam *Hippocrates* Contrafissuram  
Cranii observaverit & in scriptis suis  
annotaverit , pro palmario quasi ar-  
gumento in medium proferunt Pa-  
troni. Ille enim l. c. §. 9. præmissis quatuor  
læsionum capitis generibus , nimirum Fissura,  
Contusione , Depressione & Scissione , §. 10.  
quintum sub infortunii seu calamitatis vocabulo  
sequentibus subjunxit verbis: ὅσέον τιτρώσκεται ἄλλη  
τῆς κεφαλῆς , ἢ τὸ ἕλκος ἔχει ἄνθρωπος , καὶ τὸ ὅσέον ἐψιλώθη  
τῆς σαρκός. πῶς ὅπως ἔστος τρόπος. καὶ ταύτην τὴν συμφορὴν , ὅταν  
γένηται , ἐκ αὐτῆς ἔχουσιν ὠφελησθαι ἔδεν. ἔδεν γὰρ , εἰ πῶς ὅπως τὸ  
κακὸν τῆτο , ἐκ ἑστίν ὅπως χρὴ αὐτὸν ἐξελέγξαντα εἰδέναι , εἰ πέ-  
πονθεν τὸ κακὸν τῆτο ἄνθρωπος , ἔδεν ὅπως τῆς κεφαλῆς. Quem  
locum *Foësius* ita vertit ; *Os sub vulnere frangitur  
alia capitis parte, quam qua ulcus est, & os nudatum  
est. Quintus hic modus est. Huicque calamitati nul-  
lis remediis subvenias. Neque enim ubi istud contin-  
git, quanam ratione istud homo patiatur, aut quanam  
capitis parte ex ejus percunctatione deprehendas.*

### §. II.

Post Hippocratem autem inter veteres  
pro contrafissura militat, ille Medicorum Cicero,



*Celsus de Re Med. l. 8. c. 4. qui locum Hippocratis ita explicat: Solet etiam evenire, ut altera parte fuerit ictus & os altera fiderit, quam læsionem sequenti investigare docet ratione; Itaque si graviter aliquis percussus est, si mala indicia subsecuta sunt, neque ea parte, qua cutis discussa est, rima reperitur, non incommodum est, parte altera considerare, num quis locus mollior sit & tumeat, eumque aperire, si quidem os fissum reperietur.*

### §. III.

His accedit *Gabr. Fallopius* optime mentem Hippocratis explicans, dum statuit, non semper per vocem ἀλλῇ intelligi debere præcise partem oppositam, sed distantem a loco affecto; & quamvis per aliam partem possimus oppositam aliquando intelligere, non tamen præcise & semper, verum etiam aliam ejusdem ossis partem: potest enim esse, ut contrahatur rima in parte alia, quam ubi contunditur os, & ideo potest contingere, ut percutiatur frons in media parte, & rima contrahatur in alia; Vid. *Tr. de cap. vuln. c. 14.* in quo totus occupatus est, ut quæstionem moveat, an contrafissura factu possibilis sit, quam affirmando decidit.

### §. IV.

*Berengarium* quod attinet, cuilibet librum ejus de *Fract. Cran. Part. II. Cap. 2.* legenti apparebit, illum sibi non recte constare, cum in illis tantum craniis, quæ nullis prædita sunt suturis, adeoque ex uno continuo osse conflata, qualia plu-



pluries se vidisse testatur, gravem contusionem in una & rupturam in opposita parte fieri posse arbitratur; idem vero in iis craniis, quæ solum contigua sunt, suisque divisa commissuris accidere negat, ea procul dubio opinione præconcepta innixus, fissuram ultra futuras extendi non posse.

### §. V.

*Hieron. Fabr. ab Aquapendente Oper. Chir. p. I. l. II. c. 14. & 15. non modo hanc fracturæ speciem admittit, sed & ætiologiam ejus subjungit his verbis; Aër in cranio existens ex ictu commovetur, & totam cranii substantiam pervadit, post in parte opposita allidit, & reflectitur, renitensque illud frangit. Pari fere modo Joh. Andr. a Cruce motum vehementem reflexivum, tum agitatione aëris, tum substantiæ spiritu abundantis in calvæ cavitate contentorum pro stabilienda Contrafissura allegat.*

### §. VI.

Reliqui Auctores, qui pro infortunio militant, sunt *Nicol. Florentinus, Joh. de Vigo, Ambr. Paræus, Petr. Pavvius, Amatus Lusitanus, Dan. Sennertus, & Observationum Scriptores, Joh. Schenckius, Petr. Forestus, Nic. Tulpius, Joh. a Meckren, Stalpart. van der Wiel, Frid. Lossius, ac denique ex recentioribus Frid. Ruyschius, Paul. Ammannus, Joh. Bohnius, Joh. Dolæus, Christ Joh. Langius, Theoph Bonetus, Mich. Bernhard. Valentini, Petr. Dionis, Joh. Jac Mangettus, aliique, de quibus in cap. IV. acturus sum.*



## §. VII.

Inter illos denique , qui Physicis Experimentis Contrafissuræ existentiam probare , nec non modum , quo illa fiat , mathematice demonstrare conati sunt , primum fere locum tenet *Joan. Marcus Marci* , inclytus quondam Mathematicus atque Medicus Cæsareus , qui in suo *de proport. Mot. Fig. rectilin. & circul. quadrat. ex Mot. Tract. Part. IV. Cap. de percuss. & de Contrafiss.* hujus possibilitatem duabus rationibus probat. I. Ex figura Cranii Sphæroide. II. Ex impulsus ad majus intervallum destinati violentia , dum ita scribit : *An ergo dicendum in figura Cranii Sphæroide sitam esse causam ? quod partes ab extra presse magis stipentur magisque resistent divisioni ; a centro autem facto motu a se invicem diducantur ? ita enim fornices onera videmus sustinere & contraniti , quod si a parte interna seu cava urgeantur , fatiscere ac dissolvi. Cum ergo Cranium in modum fornicis sit reductum , non facile a plaga ab extra incidente dissolvi potest , parte vero opposita , quia impetus extra fertur , estque a centro perpendicularis , nihil mirum dissolvi continuitatem ; accedit , quod impulsus , facto principio motus a plaga , non conquiescit in parte opposita , cujus violentia ad majus intervallum destinatur. Cum itaque reflecti sit necesse & pars sinistra dextrorsum , hac sinistrorsum abeat , in illa motuum contrarietate partibus a se divulsis accidit fissura.*

## §. VIII.

Idem stabilire laborat *Illustr. Leibnitius* alio  
ex-



experimento cum annulo majori ferreo instituto, cui e tribus, vel ad *Wedelii* mentem, quinque chordis horizontaliter suspenso interius applicuit globulum æneum, ita ut perpendiculariter e filo penderet, post partem annuli diametraliter oppositam exterius percussit. Quo facto hic ellipticus factus globulum in locum oppositum excussit, uti hæc omnia *Cel. Wedelius diss. supra cit.* fusius explicuit & icone adjecta illustravit. Ille ipse porro eandem fracturæ speciem enchiresi a Cl. Filio suo adhibita & ab aliis facile imitanda confirmat, nempe campanulam æneam e filo suspensam malleo aliquoties uno eodemque in loco percussit, quo facto in parte ictui opposita statim Contrafissura aderat. Uno adhuc ictu, ut pateret, quorsum se fissura esset extensura, repetito, etiam in ipso ictus loco adeoque prorsus è diametro duas in partes campanula diffindebatur.

## §. IX.

Ultimum denique argumentum, quod ad stabiliendum resonitum tantum non omnes in medium proferunt, desumitur e vasis vitreis, testaceis, cucurbitis ficcis aliisque ejusdem substantiæ, quæ percussa facilius quam alia corpora rimas agunt. In his, ubi in uno loco impetum receperunt, sæpissime in parte opposita fractura deprehenditur, ita ut modo fissura a loco percussionis eo usque exporrigatur, modo vero velut nova prorsus continui solutio observetur, quod probatum maxime it *Soranus de Vuln. Cap.*



his verbis ; nos vidimus in omnibus vasis vitreis & testaceis , quæ cava sunt , quod si percutiamus unam partem , tunditur opposita & ego etiam expertus sum. Causam hujus Phænomeni aëri ejusmodi vasis inexistenti attribuunt , qui vehementer intus commotus nec exitum inveniens maximum partibus e diametro oppositis impetum impertiri solet. *Vid. Car. Musitanum de Vuln. Cap. c. 34.*

### CAP. III.

#### *Eorum Placita , qui Contrafissuram negant , recenset.*

##### §. I.

**P**roposuimus hætenus eorum momenta & argumenta , qui Resonitum rationibus æque ac experimentis adstruunt , pergitur itaque ad eos , qui eundem quovis modo proscribere laborant. Inter illos primo recensendi veniunt loco, qui contendunt verba *Hippocratis Cap. ant. §. I. prolata de Contrafissura intelligenda non esse.* Communis illorum velut interpretes est *Jsbr. Diemerbroeck Anat. Lib. IX. c. 4.* hunc in modum loquens: *Quantum ad citata Hippocratis verba , ille non loquitur ibi de contrafissura, sed docet interdum pus sub cranio alia parte colligi quam qua os fractum est , idque etiam nos aliquoties vidimus, sed hoc nihil probat pro contrafissura.*

##### §. II.

Inter antiquos Medicos Chirurgosque, qui  
illam



illam fieri posse negant , e multis aliis recense-  
mus *Claud. Galenum & Paul. Aeginetam*, quorum  
ille de *usu part. Lib. IX. c. 17.* palmario de futura-  
rum usu argumento inhærens, ideo cranium e  
multis ossibus componi autumat , ut si quando  
perculsum ruptumve fuerit, ne per totum ejus  
rupturæ progrediantur. Hic vero de differentiis  
fracturarum Cranii agens quintam, nempe ἀσπληγία  
fieri non posse eandem ob rationem ait, quoniam  
cranium non unico osse sed multis, & quidem  
per futuras distinctis partibus constat , quæ eum  
in finem factæ sunt, ne fracturæ futuras transire  
possint, sed prope illas terminentur. Quibus  
adjungimus *Guid. de Gauliac* eadem fere proferen-  
tem, nempe *Cranium non ex uno osse continuo, sed ex  
septem contiguis ordinatum, ad hoc, ut si lesio acciderit  
in uno, non transeat ad aliud. Sed & Diemerbroeck. l. c.  
non centies sed ducenties & pluries capite graviter per-  
cussos milites se tractasse, nunquam tamen ullam con-  
tra fissuram observare potuisse testatur.*

### §. III.

Modo dictis Auctoribus apprime consen-  
tiunt plures alii, maxime Gallorum non pauci,  
qui rationibus potissimum plerasque resonitus  
species dubias reddunt , & I. quidem , quod  
secundæ tabulæ fissuram illæsa prima atti-  
net, eam ob illarum structuram impossibilem  
esse objiciunt, quia fibræ osseæ, quæ substantiam  
Diploë componunt, ita duas hasce tabulas uni-  
unt, & conglutinant , ut una lamella altera in-  
tacta relicta findi non possit, sed ab eadem vir-  
tute



tute agente vel nullam vel utramque lædi necesse sit. II. Conceptu difficile esse ajunt, ut una ossis parte icta altera ejusdem ossis remotior frangatur, quia cranii ossa non pluribus uno in loco fibris quam in altero constant, adeoque si fractura fiat, illam non nisi in loco percusso contingere posse. III. Verosimile non esse, fissuram unius ossis ad proximum & contiguum, adeoque ultra futuras exporrigi, quia id ipsum contra futurarum usum, uti supra jam innuimus, militat. IV. Quod si etiam experientia contusionem in una & fracturam in alia parte forte demonstrarit, hanc non ab ictu primo, sed ab alia causa ortam fuisse perhibent, adeoque Contrafissuræ nomine vix dignam esse. Id quod sequentem in modum explicant, si e. gr. vis agens temporum dextro applicita tanta sit, ut eum qui ictum recepit in latus oppositum prosternat; vel etiam ut quis post lapsum in partem capitis læsam factum mentis non satis compos resurgere tentet, sicque denuo in latus oppositum prolabatur. Præ aliis vero contra hanc fracturam pugnare videtur *J. Bapt. Verduc. tr. operat. chir. Cap. 19.*

#### §. IV.

Similia de vasis vitreis, testaceis, campanis item atque cucurbitis siccis desumpta claudicare existimant, idque cuivis facile patere, quicumque consideraverit, maximum inter hæc & capitis structuram discrimen intercedere, dicta quippe vasa corpora esse continua, quorum partes omnes sibi



sibi invicem ita arcte cohæreant , ut una percussa & contremiscente reliquæ omnes similem in motum exagitentur. Longe aliter se rem habere in ossibus cranii dicunt , quippe in quibus veluti contiguis concussio hancque sequens fissura non æque ad loca remotiora extenditur. Unde non inepte ratiocinatur *Car. Musitanus l. c. Id de cranio verificaretur, si caput esset vitreum, testaceum vel cucurbitinum.* Quibus accedere volunt, quod ejusmodi vasa aëre repleta sint, qui impetum ab uno vitri latere acceptum alteri nempe opposito communicat: idem pariter accidere, si Phiala aqua plena fuerit, uti ejus rei *Fallopianus l. c.* experientia edoctus fidem facit.

## §. V.

Quodsi vero quis regerat cavitatem cranii omni corpore vacuum non esse , sed insignem cerebri copiam in sinu suo fovere, indeque eundem prorsus effectum sequi debere, illi respondent, dicto cerebro tantam vim non inesse, ut quocunque etiam modo concussum fuerit, fissuram in parte opposita producat. Insuper nihil vel saltem parum aëris intra cranium & cerebrum admitti posse adjiciunt, cui ejusmodi effectus non nisi ab impetu & vi notabili dependens adscribi possit. In quibus explicandis multum occupatus est supra *cit. Musitanus l. c.* Neque ultimo silentio prætereundum hoc est, quod integumenta capitis communia, cutis nempe, pinguedo atque muscoli impetum virtutis agentis aliquo modo infringant atque impediant,

C

quo



quo minus illa cranio immediate applicetur, hincque non tantam in illud vim exferere possit, secus fieri in vasis, quorum mentionem supra injecimus, nemo non intelligit, utpote in quæ vis applicita immediate agere solet.

#### C A P. IV.

*Observationes, quibus Contrafissura existentia probatur, exhibet.*

##### §. I.

**P**ostquam rationes cum eorum, qui Resonitum proscribunt, tum & illorum, qui ab affirmantium parte stant, in antecedentibus velut in compendio recensui, instituti ratio postulat, ut aliquas observationes, quæ dictam læsionem demonstrant, in medium proferam, idque eo magis, quo certius constat unam experientiam, quæ solida est & omni exceptione major, mille rationibus potiore esse adeoque his anteferendam. Dum autem id ago, animus mihi non est, omnes, quæ hinc inde in Scriptorum monumentis reperiuntur, sed præcipuas tantum colligere earumque circumstantias notabiliores annotare, quibus si aliquot, quæ hic Argentorati obvenere atque non inter ultimas recensendæ sunt, subjunxero, Benevolo Lectori id non ingratum fore arbitror.

##### §. II.



## §. II.

Illas ipsas vero melioris ordinis causa in classes quasdam distribuam, ad quarum Primam refero istas, quæ Contrafissuram ultra futuras se se extendere evincunt; Prima sit illa *Cel. Ruy-schii*, quæ inter Observationes Anat. Chir. XLVII<sup>ma</sup> est, de Viro, qui a mole lignea, qua palos humo infigunt, in bregmatum alterutrum delapsa prostratus omnique sensu privatus brevi fati cessit, in quo cranium post mortem denudato os bregmatis sinistrum, quantum meminit, a parte superiore ad inferiorem ex toto fissum reperiiebatur, scissura per suturam squamosam totum os petrosum & os occipitis ad magnum ejus foramen exporrecta. Secunda legitur in *Eph. Germ. Cent. V. & VI. Obs. 32 a Cl. Mauchart* annotata, quæ docet in Dimacho pessime tractato suturam coronalem a musculo temporali dextro, ad sinistrum fere usque dehiscientem & prope illam cranium in aliquot frusta diffractum; fissuram item in fronte supra oculi sinistri orbitam incipientem transversim quoque per totius cranii basin juxta os cribrosum & cristam galli pergentem, quæ per os sphenoides, Sellam equinam & os dextri lateris petrosum ad priorem usque fracturam aut verius divulsionem futuræ coronalis rediens totam superiorem maxillam in duas partes dividebat, raro admodum & longissimo decursu. Tertia referente *Garengot Oper. T. II. c. 39. a Dno Arnaud* Parisiis facta est in homine non infimæ conditionis



tionis , in quo post lapsum in cubiculo super os occipitis futura temporalis mendosa sinistri lateris multum hiabat, fissura in utroque temporum osse simul occurrente.

### §. III.

Secunda Classis complectitur illas observationes , quæ ictum in uno loco & fissuram in opposito factam esse monstrant , sic fronte icta occiput findi, aut vice versa occipitio percussio frontis ossa lædi quandoque contingit. Huc pertinet illa *Frid. Lossii Lib. I. obs. Med. 1.* quæ riam seu Contrafissuram in occipitio adeoque opposita frontis parte exhibet in viro fere sexagenario, qui a caballo sternaci excussus frontem pavimento durissimis lapidibus constrato allisit acceptoque eo loci ex lapsu vulnere domum semianimis delatus est. Similem fere casum habet *Th. Bonetus in Sepulchr. Lib. IV. S. III. Obs. 12.* de rustico, qui de plauastro lignis onusto in terram gelu constrictam supinus cecidit , quarto die morte lapsui superveniente. Facto examine in osse occipitis integro & illæso contusio levis in sinistri vero bregmatis initio fractura maxima ad oculi usque orbitam tendens conspiciebatur. Parum ab his differt ille casus , quem *Mangettus Biblioth. Chir. Tit. de Cran. fract.* proponit de futtore , qui ebrius ab excubitore in bregmatum dextra hasta majore vulneratus & post 12. horarum spatium mortuus fuit. In capitis parte dextra, quæ hastæ impetum sustinuerat , nulla cranii fractura aut rima, sed levis tantum contusio



tusio videbatur ; at vero in latere opposito, nempe sinistro circa infernam bregmatis sedem præter sanguinem extravasatum fissura duplex occurrebat.

#### §. IV.

Tertiæ Classi annumeramus illas historias, quæ Contrafissuram non quidem in parte e diametro opposita, sed magis minusve vicina aut remota, modo in uno eodemque (quod præ aliis *Paræus L. IX. c. 8.* annotasse videtur) modo vero in duobus ossibus factam docent. Ad has referas illam, quam *Petr. Pavvius Anat. succ.* recenset ; nempe os bregmatis sinistrum ea parte, qua futuræ lambdoideæ jungitur, ictum & os ejusdem nominis dextrum prope bregma loco futuræ coronariæ vicino fissum se conspexisse. Duo alia exempla annotavit *Garengot l. c.* quorum utrumque vulnus in osse syncipitis medio vel superiori, fissuram vero in osse temporum ejusdem lateris nobis exhibet. Quarto, quod illam cranii læsionem attinet, qua tabula ejus interior exteriore salva permanente læditur, & hujus exempla hinc inde prostant. Quale est illud, quod *Cel. Valentini Pand. Med. Leg. Cas. 42.* habet, quo offertur contusio duplex, una in medio cranii retro futuram coronalem, altera in dextro syncipitis latere; utroque in loco tabula interna duobus in locis fissa erat, exteriore integra existente. Similia Vid. apud *Amat. Lusit. Cent. VI. Cur. 110. Paræum l. c. & Schenck Lib. I. Obs. 56. & 57.* Quandoque non solum fissura in

C 3

ejus-



eiusmodi casu contingit , sed & interdum impetu fortiore facto interioris tabulæ portio a reliquo osse plane separatur & crassæ meningi incumbit exterius nulla prorsus læsione apparente , uti illud comprobat *Petr. Borelli Obs. 20. Cent. II.* Ultimo denique loco silentio prætereunda non sunt ea , quæ annotata legimus atque fissuram & in loco percussione & in opposito quandoque fieri comprobant. Quale est illud *Petr. Dionis Oper. Chir. Dem. VI.* de servo , qui equo excussus in pavimentum vulnus cum fractura ossis frontis inde recepit ; tribus diebus post tumor in occipitio apparens aliam in hoc osse declaravit : Huc quoque trahere licet experientiam *Nic. Fontani Not. in Cap. I. Epit. Vesal.* qua in puero , qui de muro 15. pedes alto delapsus erat , circa musculum temporalem (dextrum an sinistrum non addidit ) fracturam cum multis fissuris , similem vero etiam in latere opposito observavit.

## §. V.

Sed ne aliorum observationibus unice inniti & alienis tantum oculis cernere videar , præter supra allegatas in medium proferre proprias liceat , quamvis , ut verum fatear , a me factæ non sint , sed a Dno *LEMAIRE* Regii , quod hic est , Xenodochii Chirurgus , artis suæ peritissimo , benevole mecum communicatæ , quas juxta præcipuas circumstantias recensere instituti mei ratio postulat. Id enim maxime intendo , ut experientia solida Contrafissuras stabiliri demonstrem. Prima earum sequens est ; Anno



M DCC XVIII. Menſe Junio, miles legionis *Fig. 7.*  
 de Tallard a globulo ligneo, quales ludo trun-  
 culorum inſervire ſolent, in parte antica & la-  
 terali (*a*) bregmatum dextri absque vulnere per-  
 cuſſus eſt. Contuſio erat notabilis cum aliquali  
 integumentorum per totum futuræ coronalis de-  
 curſum intumeſcentia, ſanguine copioſo e nari-  
 bus, pauciore ex auribus effluente, cum ſen-  
 ſuum internorum abolitione & lateris oppoſiti,  
 nempe ſiniſtri, Paralyſi totali conjuncta. Ab  
 uſu ſpirituoſorum externo, VSnibus aliisque  
 remediis adhibitis & profundo ſopore velut ex-  
 pergefactus aliqualem ſenſum rucuperavit. Die  
 inſequenti incifione cruciali in loco contuſionis  
 facta cranii fiſſura obſervabatur, trepanum ideo  
 applicitum, quo facto e foramine (*f*) non parum  
 ſanguinis exiit. Repetitæ ſunt VSnes, ſopor  
 auctus & tenſio inſignis duræ matris acceſſit.  
 Brachium ac crus dextrum aliquali, ſiniſtrum  
 vero nullo prorſus motu gaudebat. Superve-  
 nientibus nono die motibus convulſivis miſer fa-  
 tis ceſſit. Remoto poſt mortem cranio oculis ſe-  
 ſtitit fractura cum depreſſione utriusque ta-  
 bulæ in oſſe bregmatis dextro ejusque ſede anti-  
 ca. Locus cranii læſus ad figuram fere triangu-  
 larem accedens ejus erat circumferentiæ, ut  
 diameter duos pollices cum dimidio æquaret. E  
 centro ejusdem plures ſciſſuræ ad circumferen-  
 tiam excurrabant, quarum duæ vel tres (*ccc*)  
 ad partem hujus oſſis ſuperiorem, totidem aliæ  
 ad infimam ejus ſedem tendebant conſtituebant-  
 que angulum inferiorem, ex his major (*d*) me-  
 diam



diam futuram coronalem percurrentes cumque minoribus coalescens aliam majorem (*b*) & insignem efformabat. Hæc eo fere in loco, ubi musculus crotaphites natales suos habet, exorta prope anticam ossis temporum partem descendens atque ad ossis sphenoidei processum pterigoideum externum delata sub apophysi Zygomatica usque ad sedem ejus inferiorem exporrigebatur; præter has ab angulo superiore prope futuram sagittalem alia fractura enascebatur, quæ a parte dextra versus sinistram (*c*) reflexa, hoc in latere eodem fere modo, quo altera in dextro excurrerat, hoc cum discrimine, quod sinistra os temporum magis supergrediebatur, in quo etiam evanescebat. Utraque mediam futuram coronalem pervadebat, illam nonnisi circa latera paulum derelinquens, quæ etiam eo in loco, ubi cranium a musculo crotaphite non obtegatur, a magna ictus vi magis tamen in sinistro quam in dextro latere hiare conspiciebatur. Insuper in eodem latere sinistro major sanguinis extravasati copia inter meninges reperiatur, quam in dextro; unde colligere licet, cerebri commotionem in illa crânii parte notabiliorem quam in hac fuisse, a qua & paralyseos causam derivare non obscure possumus.

## §. VI.

*Fig. II.* Alius Miles Legionis Tolosane e fenestra delapsus Xenodochio Regio illatus est. Facta inspectione vulnus in ossis frontis media sinistri lateris sede digitum transversum infra futuram



coronalem cum deperditione substantiæ integumentorum occurrebat, nulla oculis fractura sese sistente, ut ut cranium a pericranio denudatum fuerit. Accedebant vomitus, necnon hæmorrhagia narium illius lateris. Parti affectæ medicamenta convenientia adhibebantur, non neglectis remediis internis. Nihilominus sensus gravitatis circa regionem sinus frontalis sinistri substitit, & febre quinto post læsionem die superveniente, labia vulneris intumescere coeperunt; palpebram superiorem occupavit inflammatio, quæ oculi bulbo communicata cerebri meninges ab inflammatione immunes non esse non obscura indicia præbuit. Nono die febris prægresso horrore & cum deliriis rediit, ægerque die undecimo naturæ debitum solvit. Cranium post mortem denudato & ablato digiti transversæ latitudine infra vulnus (*a*) fissura capillaris, post notabilior (*b*) deprehendebatur ad radicem nasi tendens ac utramque tabulam ab apophyseos, crista galli dictæ, latere (*c*) penetrans; hæc ubi per tabulam internam ad superiora exporrecta est (*f*) in tres vel quatuor scissuras capillares findebatur. Circa medium dictæ fissuræ, quæ exterius patuit, alia (*e*) enata est, quæ super sinum frontalem ejusdem lateris excurrens atque ad superiorem orbitæ partem versus internum oculi canthum reflexa prope os, unguis in Anatomicorum scholis dictum evanescebat. In hac cranii læsione hoc notari adhuc meretur, quod tabula ejus externa eo in loco, qui utramque scissuram interjacebat, multum elevata fue-



*Fig. III.* rit & extrorsum protuberarit, ab interna vero portio notabilis introrsum undique secesserit, atque duræ matri incumbere visa fuerit.

## §. VII.

Tertius miles in legione des Fusiliers stipendia faciens, ebrius de prima hospitii contignatione delapsus, sensu interno pariter ac externo privatur, inde in Xenodochium Regium delatus est & examine facto, repertum vulnus in superna & media sinistri ossis bregmatis parte (a) prope futuram sagittalem cum deperditione substantiæ, ut Chirurghi loquuntur, integumentorum, ad magnitudinem duorum digitorum transversalium. Quamvis in Cranio periosteo denudato nulla fractura apparuerit, sanguinis e naribus, oculis & auribus sat copiosi eruptio non levem præbuit suspicionem vasa disrupta, cerebrum graviter commotum & sanguinem sub cranio extravasatum esse; & postquam hoc in statu velut apoplexia fortissima tactus per triginta & sex horas transegerat, fatis cessit. Aperto post mortem cranio deprehensa est fissura duplex enormis, decursumque plane extraordinarium servans; quarum prima (bbb) utramque tabulam penetrans in latere vulneris opposito, adeoque in dextro bregmate prope futuræ sagittalis medium exorta & capillarem rimam referens, ad os temporum ultra futuram squamosam dictam descendit, inde ad processum mammillarem tendens & retro ipsum reflexa, perque



que cranii basin excurrent (cc) ad magnum occipitis foramen non nisi cum ossis substantia desit, circa finem multo notabilior facta quam circa principium illa fuerat. Altera (dd) ab eodem occipitis foramine ejusque sede antica & inferiore initium sumens, osque occipitis antérieur in duas partes dividens ad sellam turcicam progressa est, hujusque medium pariter perreptans, ut & partem ossis sphenoides, quæ antedictam sellam est (e) ad os ethmoides usque exporrigebatur, atque ad apophyfin, quæ Anatomis crista galli dicitur, sensim evanescebat. De hac porro notandum, quod circa ejus initium, adeoque e regione vulneris inflicti maxima fuerit, majorque sanguinis copia interdum matrem & cranium eo in loco stagnarit. Insuper hoc annotari velim, quod si finis primæ & initium secundæ fissuræ in linea recta protraherentur, in loco concursus angulum fere rectum illæ constituerent.

### §. VIII.

Ex observationibus supra allegatis pariter ac iis, quas §. V. VI. & VII. adduxi, non obscure illucescere autumo, Resonitus seu Contrafissuræ existentiam in dubium vocari non posse. Quod enim Historiam & Figuram I. attinet, illa ad oculus demonstrat, futuras cranii non impedire, quo minus fissuræ ultra istas transseant & ab uno latere usque ad oppositi extremitatem inferiorem exporrigantur. Illa ipsa



quoque declarat, easdem futuras a fortiore impetu ab invicem separari & solito magis hiare. Quibus ita positis eam Contrafissuræ classem, quam Cap. IV. §. 2. primam esse volui, stabiliri in propatulo est. Tertia species e Figura II. confirmatur, scissura quippe in osse frontis occurrens non præcise in loco percusso sed in vicino atque inferiore conspicitur. Præterea quatenus interior tabula tantum recepit impetum, ut portio inde separata fuerit, eatenus ad quartam classem referri meretur, quamvis improprie, quia tabula exterior a fractura immunis non est. Tertia non minus Historia ostendit, qua ratione bregmate sinistro percusso & vulnerato fissura per dextrum latus usque ad ossis occipitis percurrerit finem, id quod primam & tertiam Contrafissuræ speciem manifestat. Quæ vero per infernam occipitis partem atque cristam galli ad os cribriforme excurrit, secundam speciem manifesto evincere videtur, idque eo magis, quo luculentius inde patet, dictam læsionem longe lateque excurrentem non alio in loco insigniorem esse magisque hiare, quam eo, qui parti percussæ e diametro oppositus est. Quinta denique classis comprobatur æque ac prima ex Fig. I. in qua læsio cranii & in parte icta & in opposita simul ostenditur. De qua annotare necessum habemus, hanc accurate examinatam in eo aliquatenus laborare, quod fissuræ potius continuatæ quam contrafissuræ nomen mereatur, quia, uti Cap. I. §. 5. innuimus, rima a loco icto incipiens medio in



curfu non definit. Quibus omnibus rite per-  
 pensis concludo verbis Ambr. Paræi l. c. *Ratum*  
*ergo illud est*, inquentis, *auctoritate*, *ratione* &  
*experientia confirmatum*, *alia parte ictum* & *alia fra-*  
*cturam esse posse*. Cæterum suspicor, Lectorem  
 Benevolum a me quoque expectare, ut causas,  
 signa & curam Resonitus subjungam, verum enim-  
 vero quia non alius mihi animus erat, quam læsio-  
 nis existentiam probatum ire, vela hic contra-  
 ho, Summoque Archiatro pro concessis  
 viribus humillimas grates rependo.

T A N T V M.

\*\*\*\*\*

**D**um *resonare* facis sublimia pulpita,  
 STOSCHI,  
*Contra fissuras* accidere in Capite  
 Exemplis, quæ fida dat EXPERIEN-  
 TIA, monstrans,  
 TU summa DOCTOR laude vocan-  
 dus eris.  
 Gaudia sic PATRI, sic gaudia sanguine  
 Junctis,  
 Sic etiam paries nomen in Orbe TIBI.

*Hæc pauca*  
*pia gratulationis ergo*  
*apponere voluit.*

Joan. Nicolaus Holtorff.  
 Med. Lic.



Sic juvat & studiis Medicis incumbere  
amœnis,  
Sic juvat Aonios excoluisse choros,  
Sic TUA TE virtus, sic TE doctrina ju-  
vabit,

Pulpita sic scandens: victor abire  
potes.

Perge sequi PATRIS Illustris vestigia,  
certus

Is TIBI virtutis Dux & honoris erit.

Pergito, cœpta probat præstantior Ordo  
Galenii,

Accipies studiis præmia digna TUIS.  
Tempus honoris adest: En paucis accipe  
votum,

Patriæ & ægrôtis vive, faveque diu!

*Gratulabundus apposuit*

Henricus Albertus Nicolai

Med. Cult.

Doctri-



\* \*  
\*

\*  
\* \*

\* \*  
\*

**D**Octrinam solidam, quam  
calles suavis Amice,  
In Cathedra ostendis; gra-  
tulator ergo TIBI.

*Hacce honoris amicitiaeque cau-  
sa Nobilissimo atque Doctis-  
simo Dno Candidato, Auctori,  
Amico suo integerrimo sincera  
mente apponere volebat*

Ernest. Christ. Honold.

Medic. C. Gienga-Suevus.



## Fig. I.

- a Locus Syncipitis a globo ligneo cum cranii depressione percussus.
- b Fissura triplici vel quadruplici origine in osse bregmatis dextro & inferiore incipiens atque inferius ad processum ossis Sphenoidei & pterigoideum externum desinens.
- c c c Tres aliæ rimæ in bregmatis summo enatæ, quarum maxima ad latus sinistrum reflectitur.
- d Fissura Suturam Coronalem permeans & inferius cum fissura b superius vero cum maxima c communicans.
- e Eadem in latere sinistro æqualem cum Sutura coronali, quæ multum hiabat, decursum servans, quæ postea Suturam squamosam perreptans circa inferiorem ossis petrosi sedem evanescit.
- f Locus, cui trepanum applicitum fuit.


## Fig. II.

- a Locus, in quem ex alto delapsus est miser cum tegumentorum vulnere.
- b Fissura tabulæ cranii utriusque per medium ossis frontis ad nasi radicem excurrent.
- c Alia fissura e priore velut enata & ad canthum orbitæ internum prope os unguis desinens.
- d Foramen a fragmento tabulæ internæ, quod duræ matri insederat, relictum.
- e Eadem fissura b uti per tabulam internam excurrit, exhibita.
- f Eadem fissura sursum excurrent & in plures scissuras divisa.



## Fig. III.

- a Pars sinistri Bregmatis superior & media a lapsu contusa cum vulnere prope suturam sagittalem & integumentorum deperditione.
- b b b Fissura utriusque tabulæ in osse Bregmatis dextro prope suturam sagittalem radices agens, osque Temporum perreptans retro processum mastoideum ad basin cranii reflexa.
- c c Eadem fissura per cranii basin oblique ad magnum Occipitis foramen excurrent ibique desinens.
- d d Alia rima ab ejusdem foraminis sede antica ad sellam turcicam tendens, quam ubi perreptavit, pergit ad os Ethmoideum, (e) ubi ad processum Crista Galli dictum evanescit.







*fig. 1.*



*fig. 2.*



*fig. 3.*

